

奉天通志

四角之二冊
大事清德宗

奉天通志卷四十八

大事四十八 清

清二十二 德宗五

德宗光緒二十二年春正月修山海關至中後所鐵路

東華錄正月甲辰王文韶奏查關津鐵路修成至山海關上年停工其自關外起至錦州大凌河東岸三百八十餘里工分四段內有墊成土道未布鋼軌者亦有買地未填或已填而爲雨水衝刷者購存華洋材料漸有朽壞現軍事已定若不趕緊接修恐已就之工料日久化爲烏有未成之工段又復基址就湮殊爲可惜臣飭局轉飭津工程司金達詳細查勘估計興修據稱第一段自山海關起至中後所止計程一百二十四里半土

工橋墩鋼橋梁有已修成者約尙須銀三十餘萬兩九箇月可以告竣第二段自中後所起至高橋止計程一百五十七里半僅買地基未盡布置約需銀一百五十七萬餘兩一年半可以成妥第三段自高橋起至錦州止計程五十四里土工間有完竣橋墩橋梁尙未動工其間由高橋至沿海之天橋廠二十一里暫置鐵軌以運海道購來之材料現亦稍有損壞約需銀六十三萬餘兩一年可以告成第四段自錦州起至大凌河東岸止計程四十九里半所修土工與第三段相似其餘均未布置約需銀九十五萬餘兩以上皆指從一段辦起而言若兩段同時興作則一年半便可開車一段辦起須三年餘方可開車至所估銀數員司薪水等項尙不在內等情臣覆加查核四段共

需銀三百四十餘萬兩爲數雖鉅均係應辦之工且其間已築土道若不安置鐵軌一氣呵成勢將日益坍塌勞費更多擬請自開春冰泮後先將地段趕緊修築所需銀三十餘萬兩由北洋就地籌借以免部臣籌撥其餘三段應如何辦理來春體察情形再行通籌請旨下所司知之

三月招墾海龍大圍場及養息牧大凌河等處荒地

清實錄三月丙申朔盛京將軍依克唐阿奏請派盛京戶部侍郎良弼兵部侍郎宗室溥顧辦理大圍場及養息牧大凌河羣牧等處墾荒事宜允之

又五月己亥盛京將軍依克唐阿等奏大圍場等處開禁墾荒應俟秋後履勘丈量招佃報開

又七月戊戌盛京將軍依克唐阿等奏履勘養息牧大凌河兩處開荒地段會商變通辦理情形下所司議

又九月甲辰盛京將軍依克唐阿等奏大圍場墾荒酌擬辦法下部知之

清史列傳

九十五

依克唐阿傳三月奏請派盛京戶部侍郎良弼

辦理大圍場墾荒事務

夏四月試辦奉天礦務

清實錄四月癸巳盛京將軍依克唐阿奏遵查奉天礦務現籌辦法擬由鹽釐項下墊給銀五千兩交副都統榮和試辦允之五月整頓奉天滿漢營制

清實錄五月甲寅盛京將軍依克唐阿奏統籌奉天滿漢營制

覈實整頓定爲二十八營下部議奏

清史列傳

五十

依克唐阿傳五月統籌奉天滿漢營制從實整

頓分立旗隊練兵曰盛軍綠營練兵曰奉軍督轅練軍曰親軍
凡二十八營詔從之

詔立左寶貴等專祠於奉天列入祀典

清實錄五月丙辰予故記名提督廣東高州鎮總兵左寶貴三
等侍衛永山於奉天省城西關建立專祠列入祀典從盛京將
軍依克唐阿請也

六月奉省購買鑄造銀圓機器

東華錄六月丙戌依克唐阿奏奉省鑄造大小銀圓購定各種
機器鍋爐所需價銀別無款項可籌請將此項購價並將來安

設機爐修葺房屋諸費暫由奉省各項稅捐項下每兩抽提五分核實動用下戶部議奏

安東縣大東溝等處海溢

清實錄七月癸丑諭內閣依克唐阿等奏安東縣大東溝地方海潮漫溢成災請旨賑撫一摺本年六月十三四等日大雨滂沱海水暴漲以致安東縣大東溝等處居民房屋沖塌壓斃人口當經依克唐阿等委員辦理急賑惟念海濱民情本多瘠苦現又罹此奇災蕩析離居實堪憫惻仍著該將軍等寬籌賑款查明被災輕重酌給賑恤毋任失所另片奏海城縣等處東西沒溝營地方河水漫溢成災均有坍塌民房情事以暨葢平等處亦均被水災著一併妥籌撫恤以慰災黎

秋九月中俄新約訂將東三省鐵路接連西卑里亞鐵路

東華錄九月丁未中俄新約成其文曰大清國大皇帝大俄羅斯國大皇帝願將兩國邊疆及通商等事於兩國互有益者商定妥協以固格外和好是以特派大清國欽命督辦軍務處王大臣爲全權大臣會同大俄羅斯國大皇帝欽差大臣出使中國全權大臣一等伯爵賈在北京定將中國之東三省火車道接連俄國西卑里亞省之火車道以冀兩國通商來往迅速沿海邊防堅固並議專條三中國現有火車道擬自山海關續造至奉天盛京城由盛京接續至吉林倘中國日後有不便卽時造此鐵路者准由俄國備貲由吉林城代造以十年爲期贖回至鐵路應由何路起造均照中國已勘定之道接續至盛京並

牛莊等處地方止四中國所擬續造之火車道自奉天山海關至牛莊至蓋平至金州至旅順口以及至大連灣等處地方均應仿俄國火車道以期中俄彼此來往通商之便十遼東之旅順口以及大連灣等處地方原係險要之區中國亟應速爲整頓各事以及修理各礮臺等諸要務以備不虞旣立此約則俄國允准將此二處相爲保護惟日後俄國忽有軍務中國准將旅順口及大連灣等處地方暫行讓與俄國水陸軍營泊屯於此以期俄軍攻守之便十一旅順口大連灣等處地方若俄國無軍務之危則中國自行管理與俄國無涉惟東三省火車道以及開挖五金礦諸務准於換約後卽行便宜施行俄國文武官員以及商民人等所到之處中國官員理應格外優待保護

不得阻滯其游歷各處地方十二此約奉兩國御筆批准後各將條約照行除旅順口大連灣及膠州諸款外全行曉諭各地方官遵照將來換約應在何處再行酌議自畫押之日始以六箇月爲期兩國全權大臣議定此約備漢文俄文法文約本各兩分畫押蓋印爲憑三國文字校對無訛遇有講論以法文爲準

冬十一月修旅順大連灣礮臺

清實錄十一月丁未直隸總督王文韶奏籌修旅順大連灣礮臺請飭部撥款下部議奏

二十三年春二月盛京將軍依克唐阿奏調員招商開辦東邊礦務

清實錄二月甲戌盛京將軍依克唐阿奏調員招商開辦奉天東邊銀鉛礦務開列章程請飭查覈下所司議

又奏關外鐵路煤礦擬請歸商集資開辦開列章程請飭查覈下所司議

東華錄三月己酉依克唐阿奏據翰林院編修貴鐸散館分部呈改知縣繆潤紱等會銜呈稱竊維利國首在富強而富強以開採爲急務奉天礦產饒裕甲天下如岫巖寬甸懷仁通化一州三縣礦山林立五金並產貴鐸等祖居奉天曾眼同礦師詳勘得邊外寬甸縣屬之小荒溝小湯石北弔幌子一帶山勢蟬聯十數餘里鉛苗顯露膚面皆是又勘得懷仁縣屬之涼水泉子老營溝礦洞子等處深林陡澗之中銀沙顯露苗質頗佳夾

道子大東溝二處現有銀綫亦頗暢旺又勘得通化縣屬之大
小廟兒溝至大小羅圈溝其間數十百里金銀鉛鐵各礦苗質
頗旺又勘得邊裏岫巖州屬之黑島斜長二十餘里橫亙十餘
里鉛綫銅苗漫山遍地木耳山南尖頭一帶砦鐵並生統計各
地勢均與禁山相距遙遠或三四百里至八九百里不等實與
永陵龍脈無關且係僻壤荒山與民間廬墓田園全無防礙若
得及時興辦不惟有裨奉天一省而軍餉之供度支之裕可以
計時而待貴鐸等前曾將銀鉛砂石逐細鎔鍊每鉛砂百斤出
淨鉛十餘斤銀砂千斤傾出足色紋銀十五兩是功效既不難
求而需款尙非甚鉅今擬自寬懷所屬之小湯石等八處爲始
先辦銀鉛兩項暫依土法開採其餘勘定未開各礦廠應俟試

辦得手逐漸擴充惟通盤核算將來買山置廠建屋修路砌蓋
鑪座購備柴炭延請礦師僱覓夫匠以及薪工膏火各項用費
約估本銀須二十萬兩方可集事貴鐸等現已招集商本二千
股每股百兩共計銀二十萬兩整業經寄存殷實鋪戶以備臨
時提用請自開工之日起予限半年試辦有效隨時報聞等情
並詳擬章程繪具圖說呈請具奏前來奴才伏查奉天礦務自
弛禁開採以來商股零星散布並無提綱挈領之人以致辦理
半年迄無成效又以銀鉛各礦工本太鉅集資非易置爲緩圖
奴才曾於上年九月間奏報試辦金礦期滿未能暢旺情形欽
奉諭旨仍著督飭承辦各員招集殷商多籌經費另立妥善辦
法務期成效克臻將金銀煤鐵各礦逐漸推廣不得畏難苟安

等因當經欽遵行知承辦各員妥議章程至今無進一善策者
想見辦礦不獨集資爲難卽得人亦爲難貴鐸等集資二十萬
金呈請試辦銀鉛各礦俟得手後漸事擴充亦是先難後易之
意所議章程各條尙覺切實不事鋪張但能經理有人或不至
於虛糜工本查貴鐸才長心細堅定有爲前年軍興奉旨發交
奴才軍營差遣曾派充幫辦全營翼長代籌布置頗合機宜以
之督理礦務斷不至一無展布有初鮮終合無仰懇天恩准調
翰林院編修貴鐸來奉試辦東邊銀鉛礦務以廣利源惟事關
奏調京員且核閱所議辦法尙未詳盡謹將遞到章程二十二
條繕具清單恭呈御覽仍請旨飭下總理各國事務衙門王大
臣以昭鄭重得旨該衙門議奏

三月勘辦海龍大圍場荒務

清實錄三月庚戌盛京將軍依克唐阿等奏遵旨勘辦大圍場荒務現續派委員攜帶繩弓赴圍繩丈俟四十五圍丈畢後實得荒地若干畝彙計領戶照章掣籤分撥以昭公允下部知之
夏六月松林病免以廷杰爲奉天府尹

清實錄六月壬申諭內閣松林奏病勢增劇懇請開缺一摺奉天府尹松林著准其開缺回籍甲戌擢湖南辰永沅靖道廷杰爲奉天府府尹

東華錄六月甲戌松林以病免以廷杰爲奉天府府尹

清史列傳

六十

廷杰傳二十三年陞授奉天府府尹

秋九月添鑄督辦山海關內外鐵路大臣關防

清實錄九月庚寅添鑄督辦山海關內外鐵路大臣關防從總理各國事務衙門請也

諭盛京將軍搜捕奉天東山馬賊

清實錄九月辛卯諭電寄盛京將軍依克唐阿昭烏達盟馬賊肆擾已派聶士成帶兵馳往會同敖漢王勦辦現據探聞盜目均逃奉天東山等處潛匿山中等語馬賊聲勢相通此拏彼竄是其慣技著依克唐阿飭屬派兵躡捕務絕根株毋使屯聚句結爲要

又九月乙巳電諭依克唐阿前因馬賊竄匿奉天東山卽飭依克唐阿派隊搜勦現在情形如何該處係遼陽地方與蒙古毗連聶士成現駐朝陽正可彼此照會合力勦拏以期速了

冬十月查勘山海關內外鐵路工程

清實錄十月戊午順天府府尹胡燏棻奏查勘山海關內外鐵路工程大概情形關外自中後所至大凌河造路經費估計須銀四百萬兩倘能明春動工年餘當可告成下所司知之

十一月諭停墾養息牧蘇魯克牧廠

清實錄十一月辛丑諭理藩院奏呈請代奏請旨查辦一摺據稱准都察院咨送奉天陳新蘇魯克牧丁豐陞額呈稱盛京養息牧地面閒荒開墾招佃以致衆牧丁失業無依並恐有誤

又十二月戊寅諭軍機大臣等前據理藩院奏奉天陳新蘇魯克牧丁等呈訴盛京養息牧地面閒荒有礙牧丁生計並恐有誤